

— 343 —

an diesem brief, allen den die in sehent, horent oder lesent. Daz wir den wisen lüten . . . den burgermeistern . . . den vier vnd zweinzigen . . . dem rat, vnd der gemein der stat ze Fr i b u r g in B r i s s g a w e, vnseren lieben getrūmen, von besundern genaden gunst vnd gutem willen, den wir zu in haben, von der dienst wegen, die si vns vnd dem rich vor manigen ziten bis her getan hant, von vnserm kayszerlichen gewalt verlihen vnd geben haben, vnd verlihen vnd geben ouch in vnd irer stat ze Fr i b u r g, alle freyheit vnd alle recht, nach der stet freyheit vnd recht ze K ö l n. Wir tuon, verlihen vnd geben ouch in die genad, daz wir nicht wellen, daz iemant keinen irn burger indert laden sūll noch bechlagen, vnd daz si ninder ze recht sullen stan vmb kein sache, wan vor irm schultheizzen in der stat ze Fr i b u r g. Wurd kein ir burger, daruber indert geladen oder bechlagt oder ze echte getan, daz sol in kein schade sin. Ewen aber si rechtlos liezzen, der mag wol anderstwo klagen. Wir verlihen vnd geben ouch in den gewalt vnd die recht, daz si in irer stat mūgen vf setzen vnd ab setzen win vngelt vnd forn vngelt, wenn si wellend, vnd sol nieman dar wider sin. Auch tuon wir in vnd irer stat ze Fr i b u r g von vnserer kayszerlichen gūt die genad, daz wir wellen, daz ir vorstet all, die si iezund mit muren oder greben vmmeuangen vnd begriffen hand, oder noch vmmeuahend, vnd vmmegriffen werdent, alle die recht, freyheit, vnd guot gewonheit haben sullen, die ir alte stat Fr i b u r g hat. Ewer ouch in diß vnser vorgeschriben genad all, oder ir ettlich an keinen stücken freuelichen bräch oder überfüre, der sol in vnsern vnd des riches vngenaden sin, vnd ist dar zu veruallen hundert pfunt goldeß, di halb in vnser vnd des riches kamer vnd daz ander halbtteil der oftgenanten stat ze Fr i b u r g werden sullen. Vnd daruber ze einem vrkünd geben wir in disen brief versigelt mit vnserm kayszerlichen insigel. Der geben ist ze S p y r e an mitwochen nach sant Andros tag, nach kristus geburt drüzehen hundert iar, dar nach in dem nūn vnd dreizzigisten iar, in dem sechs vnd zweinzigisten iar vnserß riches, vnd in dem zwelften des kaysertuoms.